



法軍記

リ伊8
2270
/



門 伊 8
第 2270
卷 /



湘軍歌

光緒己丑仲秋
江南書局刊板

湘軍記敘

昔周道中興宣王修政攘夷六月車攻之篇詩人詠之五
霸迭盛尊王室誅僭偽齊桓晉文之事春秋載之大抵詩
書之作其人皆諳掌故能文章揚圻盛烈以昭示來世垂
王迹於無窮非苟爲纂述已也厥後百家之說益興虞卿
呂不韋陸賈劉向之徒亦箸春秋國語而國策世本漢紀
晉陽秋之類號爲別史不掌於史官然其網羅舊聞備當
時之事成一家之言不可廢也我

朝武功烜赫

開國以來平定中外皆有方略專書藏之石渠頌之勛貴偉矣盛矣自廣西寇發湖南首當其衝吾鄉士人提挈子弟轉戰粵湘聞其後援鄂援江西始稍稍出征於外會有

詔行團練於東南諸省吾伯兄 太傅文正公始以墨經治軍長

沙用諸生討訓山農號曰湘軍湘軍之名自此始當是時我馬環生閭閻騷動強寇伺於外奸民煽於內居人倉皇驚避不遑甯居乃相率習技擊捍身家以爲苟免寇難斯已耳豈敢妄希澄清之績闕閱之榮儋爵析圭立功絕幕哉夫運之隆替時也兵之利鈍勢也時苟未至則英雄無

所用其武勢無可乘則智士捲舌而不能畫一謀今湘人士戰績遍天下仰仗

國家威靈

廟謨高深不責以近效不惜其勞費而諸將士涵濡

皇仁發奮蹈厲咸思圖尺寸之功以赴

君父之急愚兄弟以菲材膺兵柄躬逢其盛因得與觀成功蓋值剝極而復之時乘轉敗爲功之勢

聖主憂勤於上疆臣協恭於下而

祖宗養士二百餘年

膏澤及於民者至深且久儲材承平之日收效糜爛之際用能滌蕩區夏復於光明斯乃

列聖貽澤之長非區區一二臣工所能爲謀也今海內又安湘中宿將存者什二三懼其戰蹟之軼也議爲一書與

方略相表裏而執筆者傳聞異詞乃勾東湖王鼎丞觀察定安更爲之鼎丞久從愚兄弟遊諳湘軍戰事其所述者非其所目睹則其所習聞書旣成復與湘陰郭筠仙侍郎嵩燾暨下走商訂得失漏者補之疑者闕之不爲苟同亦不立異蓋其慎也至其敘事簡贍論斷精嚴則仰晞龍門俯

瞰蘭臺伯仲於陳志歐史之間可謂體大思精事實而言文者矣鼎丞少負異才不諧於俗由州縣歷監司所至樹立卓卓及承

召問攝藩條世且希其大用謂勳名可翹足待而願齟齬於時偃蹇湖山行且以著述老人多惜之然鼎丞不窮其著書必不能工且贍信今傳後如此觥觥也鼎丞昔爲詩文喜爲瑰偉悲壯之辭今迺益詣於和平雅澹蓋彬彬然幾於道矣夫名位烜赫一時而文章則千載事也韓愈氏所謂不以所得易所失者其斯之謂乎吾旣悲鼎丞之遇復爲

快語壯之

光緒十五年歲在己丑十月 太子太保一等威毅伯兩江總督湘鄉曾國荃撰

自敘

客有問於予王子曰古者天子諸侯皆有史官左史記言右史記事事爲春秋言爲尙書其載籍世官守之非儒生所得言也

聖清受命二百餘載

武功之隆邁越前古自粵捻肇亂回鶻繼虐羣寇之興替將帥之得失備諸

方略散見於

國史今吾子述三十餘年之戰蹟遵

國史

方略則爲贅言採之輿論則一人耳目難周慮美惡是非之失實也私心惑焉子王子曰蒙生楚西鄙少值寇難崎嶇烽火閒於郵傳之往來謀候之真贗雖未悉其詳固已略識梗概矣及壯佐湘鄉曾文正公戎幕從今宮太保威毅伯遊者二十餘年湘中魁人巨公什識八九其它偏裨建勛伐者不可勝數東南兵事飮聞而熟睹之久矣其後宦遊天津稍習淮軍將帥而湘陰左文襄公暨今陝甘總督茶陵譚公新疆巡撫湘鄉劉公鈔錄西北戰事累百數十

卷先後郵書見畀最後從雲貴總督新甯湘鄉兩劉公家得其章奏遺稿於是又稍知滇黔越南軼事自咸同以來聖主之憂勤生靈之塗炭將帥之功罪

廟謨之深遠上稽

方略下採疆臣奏疏粲然備具而故老之流傳將裨幕僚之塵譚苟得其實必錄焉其或傳聞異辭疑信參半者甯從闕疑非真知灼見不敢誣也班固氏有言小說家者流蓋出於稗官街譚巷議道聽塗說之所造然亦弗滅也閭里小知者之所及亦使綴而不忘如或一言可採此亦芻蕘

狂夫之議也今蒙之記湘軍蓋自託於稗官野史自爲一家言所謂不賢者識其小者與如欲參訂同異信今傳後則

方略

國史彪炳萬古固學者所宜傳習而遵守也客唯退於是乃述廣西初亂訖新疆設郡縣起

宣宗道光三十年庚戌歲至

今上光緒十三年丁亥歲凡三十有八載以湘軍爲綱而它軍

戰略附焉敘曰

皇矣

聖清包乾孕坤東南際海西暨崑崙响赫濡甘罔敢不庭蠢茲
殃徒伏灘之濱蘊其蠱毒蠱飛蛾騰八桂旣燿爰突湘沅
帥臣不武相貽遠巡觥觥忠烈俠劍儒巾提孳子弟始張
楚軍楚軍之興湘軍之萌蓑衣喋血蔡墳扼陘嶽蹶瀟泐
安堵不驚寇愕而走危隍以甯作粵湘戰守篇第一
九疑宛蟬鬱爲衡宗竺生曾相大邦維墉義旂初建鏗姦
鋤兇螟騰就殄復於昭融爰規水嬉肇造艤幢彭楊奮武
以倡羣雄遂浮洞庭建旆而東糾糾虎旅百出無窮千屢

湘軍記

目錄

卷一

輸饗萬舸傳烽蕩滌區夏還之大同始於得士成於和衷
眾志鞏固以奏膚公作湖南防禦篇第二

武昌形勝虎踞上游委之餉賊自絕其喉曾侯建義焱舉
湘陬誰其佐之塔勇羅謀雄關既下妖氛黯收東指建業
躑躅江州賊狙我隙鄂渚重蹂乃檄胡公返旂援枹拮其
堅城獸檻禽囚桓桓胡公氣吞九洲擊楫東征楚尾吳頭
李搏鮑噬如鷹脫鞬獵犬之獲發蹤之由作規復湖北篇

第三

楚師初興眾才三旅討其耕氓領以鬻序投筆提戈章江

之渚死綏赴敵沛然莫禦江作先聲曾繼其武陷舟鄱湖
頓兵袁撫李公百戰迺拔湓浦威毅急難鵠原禦侮吉安
既克百城安堵作援守江西上篇第四

左侯巍巍發軔樂平景德之戰功以智成鮑不血刃千里
橫行捲旂疾驚聞名膽驚金陵餘孽逃死山城俘而磔之
寰宇澄清作援守江西下篇第五

瞻彼皖公前江後淮瀉瀉菱湖蛟鱷所畏憑恃嶮咀以卵
以胎威毅燁燁批吭掘菱迺塹迺垣迺鑿其坏英酋遠蹕
呼黨引媒奮其角距如猗如豺鮑旅先驅多軍後截威毅

湘軍詩 目錄 四
罕之歸鬪於穴集賢蹈尸赤岡喋血遂搃雄都成此偉烈
捷書上騰

龍髯已昇告成

先廟天眷是憑作規復安徽篇第六

長淮南北任俠之窟姦雄竊據育其醜族兆受桀驚迺馴
迺服獻關納土縻以厚祿沛霖恣睢羊質虎皮反側拒命
迺戮厥尸作綏輯淮甸篇第七

金陵隩區虎躍龍驤疇壞其墉以穴貙狼向帥皤皤張公
煌煌朝蹴邗水暮踔皖疆賊蹈我瑕迺走丹陽維彼張公

號萬人敵軍鋒所至霆摧電激還戰建康復我故壁繚而
溝之功在旦夕賊逞狡謀南侵武林我師於邁戎旂駸駸
師老則殫旅分斯單燒營夜譁卒蹶於丹作圍攻金陵上
篇第八

向張旣殞朱維淪胥

帝曰汝藩作督三吳汝荃統師布政於蘇迺整其旅電掃風驅北
斲濡須南攔蕪湖遂捐秣陵連壁南都洪酋恇讐乃召其
徒其徒百萬封豕訓狐威毅笞之如割如屠忠仆侍顛棄
戈而噓迺張九戩周其四陞兩徂寒暑迺焚厥居

帝嘉乃績

錫之券書兄侯弟伯析圭剖符

紫閣圖形載之典謨作圍攻金陵下篇第九

蘇松財賦甲於東南羣盜潛焉虎視眈眈迺薦肅毅秣厲
戎驂其才恢恢其量侯侯提挈健兒復我腴土淮軍之勳
湘軍之輔連類書之用彰

皇武作謀蘇篇第十

左相未遇自擬葛侯異軍特起開府南陬翩翩巾扇秩秩
帶裘其佐伊何左楊右劉烈烈蔣公百戰彌道載垂衢嚴

遂批龍游張置富陽嘖鋒杭州覆巢擣穴遂平百甌錢唐
飲馬吳山放牛果敏之勳文襄之謀作謀浙篇第十一
五嶺瘴壤八閩蠻區民情獷獷趨如猿狙洪楊發難金田
是廬李汪餘骸殄於七墟桂林之戰忠烈濫觴嘉應葳功
成於文襄作援廣閩篇第十二

藍李之禍發自川滇石寇乘之峩蹕嶓巔駱相休休讓善
推賢渠魁授首兵連渭汧多帥智勇韓白比肩秦隴垂靖
星殞八川劉公撫陝愛民是先戰功未竟憂心拳拳作援
川陝篇第十三

貴州僻陋漢苗雜處羣醜呶譁獲騰磨聚楚師躡之深入
巖戶劉席策勳迺復疆土作平黔篇第十四

雲南萬里夷獠所蟄外有甌脫職方弗及杜酋竊踞連城
數十燭其種人戈旄蔽岑公崛興羯羴是習劉帥督師
崎嶇巖邑剗平大理蒙段就紮野番造釁英夷渝盟

帝命武慎節度百城驕將解柄黠虜銷兵蠲除煩賦百蠻以平
作平滇篇第十五

捻徒夥掠伏患百年乘隙蠶起寇騎聯翩僧王蹇蹇日屬
囊韃百勝一踏頽嶽填淵

帝曰欽哉咨藩暨荃汝司北伐汝鎮翼躔迺築長墉千里連蜷包
淮羅濟搃寇於川大功未卒屬之後賢守其遺躅收功齊
燕作平捻篇第十六

回入中夏自隋而唐訖於有元種益熾昌而士而農而工
而商而登顯仕頌容廟廊如何械殺肆其虎狼而陝而甘
悉焚悉戕仇讐初起纖塵涓流釵究乘便搖撼山邱多帥
死綏雷陶譁潰赫赫楊公亦訖於內嗟我楚軍忍飢赴塞
百金石粟十金孟菜救死不贍遑云敵愾天降喪亂以待
仁人謂予不信請視隴秦作平回上篇第十七

左侯西征誓期五年二劉贊之蕩滌腥羶羣回憧擾聽命
化隆金積之戰電掣雷轟忠壯烈烈歿爲鬼雄京卿翩翩
卒蕨厥功沙幕策勳衛霍媿隆作平回下篇第十八
迢迢西域漢唐所庭其北烏孫遙接丁零烏垣雄鎮歿於
妥明帕夏亡虜竊我八城或議棄之息民休兵昂昂左相
執簡而爭載攻古牧遂取車師劉軍南邁我後期俄人
虎視市地居奇耄齡出塞規取伊犁充國非老班生非穉
封侯萬里以酬夙志作戡定西域篇第十九
兵家神用匪可迹求魏不沿漢秦非襲周湘軍之制固壘

深溝取捷短衣制勝礮舟首重樸誠次日同仇戰死是榮
巧避爲羞官卑權重分隔誼周備書規模以紀前籌因時
制變後賢是求作水陸營制篇第二十

子王子曰蒙以不才廢棄居夔陵山中湘中諸君子書問
相勉而爲此作自光緒十三年三月訖四月成第一至第
五卷又自十月訖臘月成第六至第十一卷明年五月放
櫂南游客新甯劉氏湘人士敦促自八月訖九月成第十
二至第十五卷而余有江南燕齊之行過長沙與郭筠仙
侍郎商推得失攜其橐呈威毅伯曾公又明年三月余歸

湘軍記
自叙
八

東湖六月至金陵盛暑移居鷄鳴寺梁之同泰寺也湖光山色日在目中意興蕭疏超然有物外之想因念人世悠悠不可無所作以自遣其傳後與否有幸有不幸耳非吾所能主持也迺續成五卷自七月訖九月畢事閱時幾三載歷遊五省中間人事牽率忽作忽輟其執筆爲文凡九閱月耳書成旣爲敘例復志其顛末如此

湘軍記目錄

卷一

粵湘戰守篇

卷二

湖南防禦篇

卷三

規復湖北篇

卷四

援守江西上篇

卷五

援守江西下篇

卷六

規復安徽篇

卷七

綏輯淮甸篇

卷八

圍攻金陵上篇

卷九

圍攻金陵下篇

卷十

謀蘇篇

卷十一

謀浙篇

卷十二

援廣閩篇

卷十三

援川陝篇

卷十四

平黔篇

卷十五

平滇篇

卷十六

平捻篇

卷十七

平回上篇

卷十八

平回下篇

卷十九

勘定西域篇

卷二十

水陸營制篇

共二十卷

風然剽疾易發怒羞懦而矜節不畏強梁士則矜矜自表
異模騷範雅喜爲瑋異絕麗之詞迨宋周敦頤闡明聖道
講學濂溪海內嚮風景從理學興矣

本朝嘉道閒學者著書稍稍談經濟究韜略明習國家掌
故於是魁材傑士接踵驤起自廣西寇發海內騷動新甯
江忠烈公忠源實倡義旅而王壯武公鑫羅忠節公澤南
以諸生起其後李忠武公續賓胡文忠公林翼左文襄公
宗棠劉武慎公長佑蔣果敏公益澧暨今總督曾公國荃
尙書彭公玉麐總督楊公岳斌巡撫劉公錦棠征伐四出

用兵遍十八行省一時湘人由戰功任封圻者總督則有
劉公岳昭劉公坤一楊公昌濬巡撫則有李勇毅公續宜
劉果敏公典劉公蓉唐公訓方陳公士杰其以提鎮權巡
撫者則有田公興恕江誠恪公忠義而勞文毅公崇光侍
郎郭公嵩燾總督譚公鍾麟巡撫黎文肅公培敬雖起家
翰林亦皆涉歷兵事其他專閫監司以勳伐昭著於時者
不可勝數遂克僞都虜名王粵匪捻回旣誅餘威震殊俗
北懾烏桓南渡臺澎越裳西北涉流沙達烏孫西南暨于
闐葱嶺武功之隆近古罕覩然而總其成者湘鄉曾文正

公國藩也。原湘軍創立之始，由二三儒生被服論道，以忠誠爲天下倡。生徒子弟日觀月摩，漸而化之。於是畊氓市井皆知重廉恥，急王事，以畏難苟活爲羞，克敵戰死爲榮。是豈有所劫而爲之耶？賢人君子倡率於上，風氣之所趨，不責而自赴也。善乎荀卿之論兵也！曰：好士者強，不好士者弱。百將一心，如子弟之事父兄，手臂之捍頭目，而覆胸腹也。夫兵者凶器，挈萬人以爭旦夕之命，必耳目專而號令一，然後惟所指揮，無不如志。古者大事必乘其產，況士卒乎？故廉頗趙將，仕楚無功，思用趙人，項羽勇略蓋世，而

用江東子弟八千，漢晉大將有家兵，唐之藩鎮重牙，將其後有義兒軍，明之劉鋹用川兵，戚繼光用浙兵，此尤其彰彰著明者也。夫江東兩浙之人，文弱選懦，非如朔方之士，諳弓馬，耐寒暑，然而用之有功者，非以其素習然耶？當秦漢魏晉時，燕代秦隴，士馬精彊，甲天下，其尤著者，五郡良家，其俗雕悍，習戰鬪，唐則河南北方鎮跋扈，將驕卒悍，五代之亂，聞太原兵下，則中原震恐，故曰關西出將，由來久矣。今其山河未改也，人民猶昔也，然而值大亂之興，綠營之兵，皆皆窳偷生，聞殺聲則跳，而湘軍椎魯剽邁，舍粳稻

而啖麥菽。委舟船而逐駝馬。短衣跣足。馳騁萬里。屢踰而不挫者。豈不以忠義奮發。禍敗相救。一德而一心乎。若夫將與帥不相能。兵與將不相知。是貨市傭而戰之。其不攜貳離潰者鮮矣。先是道光中葉。楚粵邊郡。妖徒結黨羽。噍血盟。號添弟會。椎擊攻剽。官吏莫誰何。會英夷事起。師船翔海上。粵中募健兒防夷。款成散伍。輒嘯聚爲盜。姦宄橫行。所在萌檠矣。江忠源者。新甯舉人。豁朗有大志。夙與湘鄉曾國藩友善。居京師。嘗從容語國藩。教匪招誘良民。天下洶洶。亂將作矣。旣歸。而雷再浩煽變。忠源密繕兵仗一

戰。焚其巢。諷賊黨縛再浩磔之。用功擢知縣。湘人以書生殺賊。自忠源始。忠源曰。亂雖定。大吏不肯痛誅餘黨。禍猶未已。未幾。而李沅發戍官據城。巡撫馮德馨遣戍。又未幾。而廣西羣盜蠡起。洪秀全楊秀清之徒出。大亂興矣。洪秀全者。廣東花縣人。少飲博無賴。敢爲大言。粗知書。賣卜爲活。聞妖人朱九濤倡上帝會。與同邑馮雲山往師之。以其術遊廣西。居鵬化山。時人未之許也。桂平曾玉珩私引重。延爲塾師。武宣蕭朝貴。秀全妹婿也。與貴縣石達開秦日綱皆客桂平。陰相比附。師事秀全。秀全嘗詐死七日。復甦。

謬眾云上帝召我有大劫拜天則免遂託泰西人所稱耶

蘇教者造真言寶誥謂天曰耶火華耶蘇為長子秀全次

子其咒辭贊美上帝云云咒尤俚誕其言曰讚美上帝為

主讚美風神風為神靈讚美三位為合一真神天父洪

恩廣大無邊不惜太子遣降人間人知悔改魂得升天以

誑眾斂錢男婦多信爭事之楊秀清者廣東花縣人居桂

平之平隘山尤桀黠自言通天語秀全為天兄嘗託天父

降其身令秀全跪受杖已有過亦令人杖訶人陰私擿發

多奇中以此詫於眾眾盡駭謂秀全果天所授也是時廣

西歲洊饑羣盜蠡起慶遠則有張家幅鍾亞春柳州則有

陳亞潰陳東懸山豬羊武宣則有劉官方梁亞九象州則

有區振組潯州則有謝江殿而陳亞潰尤悍且眾其他南

甯思恩太平等屬賊氛遍地其黨分廣馬土馬大股數千

人小股數百人大府隱忍不上聞盜益肆無忌廣西紳民

航海訴於京都察院以聞時鄭祖琛為巡撫閔正鳳為提

督

詔詰其縱賊

命兩廣總督徐廣縉赴梧州討之以廣東韶連有匪弗能

至

文宗益促鄭祖琛出省督師。道光三十年六月，祖琛移駐平樂府。而洪秀全始倡亂金田村。金田村者，桂平縣地。西則武宣貴縣，客民夙與土民雜處，相仇。村人韋昌輝，原名正，饒於貲，與秀全等句結號四十兄弟。時顧元愷守潯州，有訴昌輝罪狀於郡者，檄桂平令倪濤緝治。下昌輝獄，已而釋之。副將李殿元謂令受金，率兵追昌輝，及於韋家祠。倪濤亦至，笞責昌輝。其夜昌輝糾眾放火，殿元等跳刺殺。巡檢張鏞於是楊秀清石達開秦日綱皆會金田，欲置首無適用。相與謀曰：洪秀全天兄宜爲王，遣人至花洲山迎

之。遂踞金田爲巢穴，分赴旁邑，招納諸亡命，拜上帝會者。貴縣林鳳祥，揭陽羅大綱，衡山洪大全等，率黨從之。有眾萬人。鄭祖琛度力不能殲賊，疏請命大將會剿。

詔移固原提督向榮爲廣西提督，閔正鳳爲固原提督，旋以正鳳參寇，褫職遣戍。九月，向榮至桂林。時慶遠思恩南甯土匪蔓延，勢尤猖獗，而秀全等異軍特起，猶未指名。十月，向榮擊賊慶遠，破之。索潭墟賊走忻城，復敗之。而陳亞潰爲知縣李孟羣所擒。秀全等用是乘閒徇略，眾日益熾。詔前雲貴總督林則徐爲欽差大臣，鄭祖琛罷職遣戍。以

則徐攝巡撫。薨於途。起前兩江總督李星沅爲欽差大臣。布政使勞崇光署巡撫。十一月丁巳。副將伊克坦布攻金田。敗歿。十二月。

詔前漕運總督周天爵爲廣西巡撫。加總督銜。辦理軍務。向榮由橫州移師金田。

咸豐元年正月乙巳。向榮軍失利。洪秀全進屯大黃江。分掠桂平武宣貴平南等縣。前鋒及象州。三月。副都統烏蘭泰幫辦軍務。與向榮疊有斬獲。時李星沅周天爵不相能。疏請統帥。四月。

詔大學士賽尙阿赴粵視師。

賞邊必隆。刀帥都統巴清德。副都統達洪阿。將四千五百人。道湖南趨廣西。星沅卒。武宣軍。

詔授賽尙阿欽差大臣。未至。以周天爵權之。賊自武宣潰圍。東北走象州。周天爵劾提督向榮總兵秦定三不遵節制。

文宗以將帥不和。罷周天爵督師。褫總督銜。榮定三均奪花翎。鄒鳴鶴爲廣西巡撫。五月。烏蘭泰向榮敗賊象州。湖南巡撫駱秉章疏言。湖南防兵僅四千。永寶靖郴昆連粵。

境恐土匪內應提督余萬清前奉

詔出境擬駐楚粵之交防堵

詔湖廣總督程裔采行邊六月賽尙阿至桂林增募潮勇
奏調江忠源赴大營忠源官秀水知縣遭父喪歸聞命募
鄉勇五百以從號曰楚軍賽尙阿屬之烏蘭泰湘人出境
討賊自此始壬午烏蘭泰秦定三擊賊新墟敗之七月向
榮烏蘭泰達洪阿等攻賊紫荆山克豬子峽雙髻山向榮
乘勝欲擣花雷茶地巴清德以五不可止之八月賊自大
黃墟分水陸趨大黎犯永安向榮由桂平追之烏蘭泰秦

定三由鵬化山追之烏軍阻山內向軍遇雨致挫閏八月
甲申陷永安始僭偽號曰太平天國洪秀全自稱天王楊
秀清爲東王蕭朝貴西王馮雲山南王韋昌輝北王石達
開翼王洪大全天德王秦日綱胡以晄等稱丞相軍師時
粵匪二十餘股多爲勞崇光所殄惟秀全等獨存然已凶
肆不可制烏蘭泰聞永安已破自花祿山行三百里舍馬
徒步軍士皆疲至佛子村留江忠源防守賊二千人來抄
忠源奮擊破之斬馘八百九月賽尙阿移屯陽朔鮑起豹
爲湖南提督屯江華十月烏蘭泰敗賊莫村十一月賽尙

阿合軍圍永安官軍數十營向榮統北路烏蘭泰統南路或言兵法圍城當缺一隅榮信之時江忠源贊烏蘭泰軍幕頗被賓敬知榮有違言以書曉譬禮下之已甚冀感動榮卒不得復代爲一書抵榮力諫圍師缺隅之非請合圍聚殲又不能得因引疾歸

二年二月戊戌賊自永安潰圍北趨陽朔己亥烏蘭泰邀擊山岡斬二百人擒洪大全會大雨士餒甚烏蘭泰率親兵入山向榮繼之賊合隊復戰山徑犖确爲賊乘總兵長瑞長壽董光甲鄒鶴齡敗死榮故隸果勇侯楊遇春部諳

軍事度賊必趨桂林疾引所部開道馳救烏蘭泰忿失寇率死士追至六塘墟距桂林僅六十里賊懼城兵夾攻奮力反擊烏蘭泰受礮傷薨三月洪秀全圍桂林向榮介馬疾馳先一時入省城與鄒鳴鶴設守禦余萬清將千人往援屯北門賊圍攻甚急江忠源聞警發家財募勇千二百人往援劉長佑與之偕劉長佑者曾領鄉兵擊破土匪李沅發者也既至桂林壁城東鷓鴣洲再破賊於大花橋楚軍名始顯踰月賊解圍北走靈川丁守存等檻送洪大全京師磔於市四月甲申賊陷興安丙申陷全州賽尙阿遣

和春將七千人追之壬寅賊入湖南境江忠源躡賊全州
慮賊乘湘水漲劫船東趨長沙急扼蓑衣渡狹夾岸多
林木伐木爲堰張旗幟爲疑兵部署甫定賊果劫民舟蔽
江下忠源扼擊之鏖戰兩晝夜斃賊千計焚賊舟幾盡僞
南王馮雲山中礮死賊棄輜重登陸竄永州阻水東走道
州是時湘水漲省防尙無備方圻治城垣微忠源堵擊賊
船三四日卽抵省言者謂蓑衣渡一戰爲保全湖南首功
云余萬清時防道州棄城不守總督程喬采駐衡州聞寇
遽登舟北行乙巳道州陷程喬采還衡州六月庚辰朔賽

尙阿移駐永州合兵二萬餘人圍道州檄鮑起豹還長沙
賊分犯江華永明嘉禾藍山陷之七月己酉朔陷桂陽庚
戌陷郴踞之長沙戒嚴

詔罷駱秉章以張亮基代之逮治余萬清以雲貴總督羅
繞典赴任道長沙留會辦防堵繞典與秉章議防守多不
協惟禁訛言示鎮靜綠營兵才三千餘募勇三千助守僞
西王蕭朝貴者自矜雄智訶長沙守兵單冀可襲而取也
時賊大股由郴移踞永興徘徊未敢進朝貴獨率死黨千
餘繞山道東北行丙寅陷安仁丁卯陷攸遂由醴陵趨長

沙初省城得江忠源書議者料賊當從耒衡來偵卒報賊已過醴陵或疑醴陵令無公牘在籍知府黃冕曰賊至令不死卽走奚暇牘也宜急爲備丙子賊犯石馬鋪守將福誠尹培立以陝軍拒戰力竭死之潰軍走省城羅繞典方巡城南遽還塞其門居民倉卒見寇幟始大譁賊逼社壇嶺城上發礮擊微卻遂踞南門小西門築壘於妙高峰齧山廟示持久時城中兵勇八千餘隸巡撫舉貢生員或請領百人數十人佐巡堞口輒詣羅繞典言事善化知縣王葆生與黃冕頗解談兵戰守具倚以辦湘楚信巫好鬼夙

崇信長沙城隍神禳禱者日塞路提督鮑起豹昇城隍大像寘南城樓布政使潘鐸步巡衢市諭居民無恐八月壬午副將鄧紹良將九百人入屯南城總兵和春常祿李瑞德亮與江忠源倍道赴援抵長沙忠源察省城形勢以南城天心閣地勢高與城外蔡公墳犄角可以屏蔽東北二面與賊相持卽馳踞蔡公墳蕭朝貴率眾來爭忠源且戰且築壘和春比附而營自是賊祇踞南城一面不能旁擾自廣西解嚴向榮稱疾桂林遷延不出鄒鳴鶴復以留防省城爲請

文宗怒。禡鳴鶴職。以勞崇光爲巡撫。於時賽尙阿吳文鎔
張亮基徐廣縉交疏劾榮。

詔禡職遣戍。榮乃起。率師援湖南。癸巳。榮追師至西岸。營
嶽麓山。丁酉。巡撫張亮基新自雲南來。縉城入。延湘陰左
宗棠入幕贊軍事。宗棠旋薦郭崑燾襄理文檄。蕭朝貴攻
南門。官軍擊之殪。時洪秀全楊秀清尙踞郴。聞朝貴死。悉
黨突至。庚子。攻城。江忠源秦定三迎擊小勝。忠源中矛墮
馬退。賊分屯西岸。蔓延至水鷺洲。我軍自天心閣迤邐至
新開鋪。皆築堅壘。軍聲頗壯。張亮基潘鐸喜拊循。日齎酒

肉餅粥犒守陣士。約出城殺賊者。級五十金。城中人人自
奮。少壯持矛。老弱傳餐。夜張燈坐門。備姦謀。每賊薄城。守
陣者呼。市民皆大呼。聲動湘水。九月丙辰。賽尙阿至。諸援
軍大集。近五萬。皆遙壁數里外。相顧莫肯進。賊忿朝貴之
死。以榔桂礦夫穴地攻城。九月丙子。南城魁星橋地雷發。
城裂四丈。參將張協中拒戰死。鄧紹良拔刀當城缺。其部
卒方攤錢博戲。聞警皆奔集。賊一人執黃旗先登。紹良手
刃之。弁兵齊下。斃數百人。黃冕呼練丁掘街石塞缺口。城
守復完。十月己卯。金雞橋地雷再發。和春江忠源堵之。甲

湘軍記 卷一
午魁星橋地雷又發城崩八丈副將瞿騰龍率死士拒缺口迎擊賊敗走官軍環城鑿外濠防穴地賊鎗礮環擊鑿者多死乃縛竹爲牌斜倚濠蒙以溼絮丸至輒墮濠始成先是

朝廷以長沙被圍奪饗尙阿程喬采官命徐廣縉代之廣縉駐湘潭遣福興駐蘄家河不進省城外惟向榮時與賊搏戰榮欲奪水鷺洲古所稱橘洲也四面環水或以險絕諫榮易之甫渡賊繞洲尾襲其後部卒三千皆潰榮乘善馬揭水而免城上望之奪氣賊圍攻久地道屢無功洪秀

全懼眾攜貳偽造玉璽稱天授脅眾呼萬歲乙未夜半從浮橋渡湘西走道龍回潭趨甯鄉故分小股南行丙申城軍瞭賊壘無人走鬪鬪相告將帥愕視不知所往巡撫謂賊犯湘潭乃傳令南嚮徐廣縉偵賊走甯鄉遣兵防湘鄉而賊按隊徐行途中無遮遏者徐廣縉聞賊退始至長沙戊戌益陽陷賊掠船數千出臨澧口臨澧河新豎木椿塞石截行舟賊分軍趨湘陰阻水不得渡悉軍拔臨澧河木柵出洞庭犯岳州提督博勒恭武道員王東槐先數日棄城走守令皆跳十一月己酉陷之時湖北爲防江計塞土

星港距賊數月遮留估舟五千餘賊盡劫之東。滕鱸萬艘。帆幟蔽江。所過城鎮望風披靡。乙卯犯漢陽。戊午陷之。焚漢口鎮。十二月己卯陷湖北省城。

詔逮治徐廣縉。以張亮基署湖廣總督。潘鐸署湖南巡撫。賂秉章署湖北巡撫。羅繞典防荆襄。起復侍郎曾國藩幫辦團練。初國藩官京秩。以理學文章著。立朝謇諤。有大臣之言。中外想望。丁母憂回湘鄉。自以奉諱歸。不宜與軍事。張亮基謀報武昌陷。庶吉士郭嵩燾復勸之出。是時各省治團練。率名應無實效。國藩至長沙。與巡撫策守禦。疏言。

湖南標兵調赴大營。行伍空虛。因於省城立一大團。擇鄉民壯健樸實者招募來省。練一人收一人之益。軍興二年。糜餉不爲不多。調兵不爲不眾。往往見賊逃潰。從後尾追。皆以大礮烏鎗遠遠轟擊。未聞有短兵相接者。今欲改弦更張。宜以練兵爲要務。臣參仿前明戚繼光近人傅鼐成法。但求其精。不求其多。於是檄羅澤南募湘勇三營。日訓練之。湘軍之興自此始矣。

王定安曰。自古姦雄竊據。必有悍厲跋扈之姿。攻城掠野。躬親百戰。而後僅乃得之。洪秀全一猥庸鄙夫耳。未嘗親

湘軍記
卷一
行陣其才智不過下中託名西洋外教語尤怪迂不經非至愚極闇之人不能眩然而乘世亂一呼媿徒響應爲之效死者十餘年秀全坐擁僞號不出堂閫流毒及十六行省豈天降喪亂長養凶族俾吾民丁其厄耶毋抑初縱之而後遂不可制耶語云滔滔不絕將成江河諒哉

湘軍記卷一

東湖黃學濂校字

湘軍記卷一

東湖王定安撰

湖南防禦篇

咸豐二年十一月洪秀全竄湖北諸將帥援軍隨之東長沙守兵才四千江忠源所部楚勇最驍勁巡撫張亮基聞湘鄉羅澤南王鑫以諸生辦團練有名檄令各募一營備攻剿會侍郎曾國藩奉

命治團練駐長沙於是各軍皆隸國藩頒發營制稍用戚繼光兵法訓練當長沙被圍瀏陽姦民周國愚藉徵義堂

名蓄養死士陰與賊通廩生王應蘋發其書被殺有

詔按問十二月巡撫張亮基命江忠源討之瀏陽知縣懼禍意主羈縻力辨其無反徵在署吏胥多爲徵義堂黨羽知縣聞已發兵惶急至爲血書上巡撫保徵義堂不爲亂巡撫心動左宗棠郭崑燾力持之密飭忠源急進兵至馮家嶺國愚率其黨蔽山而至猛撲官軍忠源迎擊破之追至雙江口斬馘數百國愚走江西徵義堂伏莽數十年一戰除之人心稱快忠源移軍剿益陽土匪盡捕獲平之三年正月張亮基赴督湖北挈江忠源從楚勇畱長沙者

以江忠濟劉長佑統之曾國藩奉

命治團練以承平久吏治因循官民閼塞不通姦民枉法者益眾乃飭省城編查保甲手書告各郡邑官紳遇匪徒竊發密函達省用巡撫令旗誅之或杖斃不以煩獄吏考求民間利病興革刑賞一以自任其書辭引岳忠武不要錢不怕死二語自誓遠近喁喁企望國藩專務以忠誠感召人心每鄉里士來謁溫語禮下之有所陳務畢其說言可用則斟酌施行卽不可用亦不加詰責有異等者雖卑賤與之抗禮人人爭被濯冀自效權其材智長短器使之

湘軍記 卷二
聽俊愿慤各盡其用人無棄材二月洪秀全陷金陵向榮
駐師孝陵衛號江南大營

詔授江忠源湖北按察使赴江南幫辦軍務江忠濟劉長
佑等悉軍以從署巡撫潘鐸以賊去湖南遠奏撤兵二千
餘畱沅州兵千七百防省城時永桂以上會匪充斥乘粵
賊之變聚眾稱兵曾國藩重弭內難州縣寇發聞信發兵
數百即日啟行命左右料簡軍裝無稍稽畱所至弭定奸
胥蠹吏亦時以便宜誅之牧令皆悚息常甯土匪何六吳
獻聚白沙堡擾及嘉禾國藩遣王鑫將湘勇劉長佑李輔

朝將楚勇往討未至匪先潰三月衡山土匪劉積厚作亂
劉長佑羅澤南王鑫討平之餘黨竄至攸適安仁姦民劫
獄燒官署劉長佑張榮組會剿平之國藩疏言湖南會匪
之多人所共知去年粵逆入楚凡人添弟會者大半附之
去然尚有餘孽未盡此外又有串子紅黑半邊錢一股香
等會往往成羣結黨獻聚山谷如東南之衡永郴桂西南
之寶慶靖州萬山叢薄尤爲匪徒卵育之區近年有司亦
知會匪之不可遏特不欲其禍自我發積數十年應辦不
辦之案任其延宕數十年應殺不殺之人任其橫行遂以

釀成目今之巨寇。今鄉里無賴之徒，造作謠言，白日搶劫，非痛加誅戮，無以銷逆亂之萌。臣欲純用重典，但願良民安生，卽身得殘忍嚴酷之名，亦不敢辭。

詔允之。四月，潘鐸病免。駱秉章仍移湖南巡撫。安化串子會煽變，以湘鄉知縣朱孫貽往剿。大庾匪入桂東，以張榮組往剿。夏廷樾率湘勇七百繼之。陽山匪犯宜章，臨武、永興、匪掠安仁，並遣夏廷樾等討之。兵至輒解散。五月，廣西興安、恭城匪犯永明、江華、藍山、臨武、零陵、永桂，官兵拒討之。鄱衡山姦民復煽動，張榮組羅澤南往捕之。五月，曾國

葆募湘勇至長沙。國葆，國藩弟也。江忠源援江西，乞師湖南。國藩遣夏廷樾、朱孫貽、江忠淑、羅澤南等率三千六百入赴之。湘軍援鄰省自此始。六月，國藩疏薦參將塔齊布可大用。

詔賞副將銜。塔齊布初以守備見國藩，偉其才，每操軍執旗指揮，雖甚雨，矗立無惰容，遂深爲國藩所倚，令縮辰勇。七月，王鑫擊廣東匪於興甯，敗之。長沙協副將清德逮問。初，國藩訓練所部湘勇，令在城官兵與湘勇五日一會操。塔齊布時署左營守備，日操皆至，清德弗善也，愬之提督。

鮑起豹。詆塔齊布附國藩。起豹檄各營停操。於是兵與勇齟齬不相能。會湘勇試鎗。誤傷標兵長夫。因吹角搖旗攻湘勇。城內官民洶惶。國藩鞭一人以謝。八月。永順兵與辰勇械鬪。提標復吹角列隊攻辰勇。俄而圍塔齊布參將署。文武官坐視置不問。標兵益猖狂。公圍國藩行館。矛傷從者。巡撫諭解之。乃已。是時江忠源援江西。解南昌圍。奏稱賊據長江之險。宜飭湖南湖北四川置造長龍戰船。奉旨允行。國藩移駐衡州。以造船自任。湖南水師所由始也。會國葆率湘勇從至衡州。塔齊布率辰勇駐醴陵。鄒壽璋

率湘勇駐瀏陽。儲玟躬率湘勇駐郴州。會江西土匪陷太和安福。羅澤南攻克之。餘黨竄茶陵安仁。塔齊布討平之。九月。江西匪犯興甯。廣東匪犯宜章。儲玟躬周鳳山擊走之。時國藩在衡州募練水師。衡陽廩生彭玉麐故有名。國藩一見器之。乾州楊載福任湘陰外委。調至營。並令佐國葆。國葆力薦二人之才。當獨領一軍。乃檄各募水勇一營。彭楊治水師自此始。張亮基師潰田家鎮。江忠源馳援。戰不利。總督吳文鎔入守武昌。疏請援師。

詔會國藩援鄂。十月。武昌解嚴。江忠源爲安徽巡撫。戊戌。

常甯土匪起陷縣城十一月壬寅朔曾國葆周鳳山禦於
洋泉斬二百人乙卯匪陷嘉禾庚申圍藍山乙丑儲玟躬
擊匪古城斬七百人己巳竄道州四庵橋張榮組儲玟躬
等擊走之十二月乙酉郴州匪犯永興羅澤南討平之
四年正月乙卯吳文鎔戰歿黃州台湧爲湖廣總督曾國
藩始大舉東征水陸萬七千人集湘潭賊酋石祥貞自湖
北犯湖南二月庚午朔陷岳州乙亥陷湘陰壬午陷甯鄉
曾國藩師次長沙聞粵賊大至遣儲玟躬曾國葆趙煥聯
等分道迎剿玟躬破賊甯鄉乘勝率十餘人逐北陣亡他

軍連敗賊於靖港新康褚汝航等水師至湘陰賊聞風潰
走岳州復時貴州道員胡林翼應吳文鎔之調率黔勇六
百至金口聞文鎔歿無所屬國藩檄剿崇陽通城土匪塔
齊布往助之三月辛丑國藩至岳州林源恩敗賊平江乙
巳胡林翼敗賊上塔市丙午塔齊布敗賊江南橋是日北
風大作岳州師船多壞丁未王鑫禦賊羊樓司敗績退守
岳州鄒壽璋謂城空無食不可守鑫不聽戊申賊攻城急
壽璋率所部至南津眾大亂國藩調師船迎救鑫縋城出
退保長沙賊乘勢竄靖港陷甯鄉丙寅陷湘潭豎木城湘

水上以阻我師。塔齊布自崇陽回援。丁卯抵湘潭。出賊不意。與搏戰。士皆一當十。賊自起。官軍率先遁。未嘗當強敵。塔齊布先士卒陷陣。賊驚視。反相蹂。再戰再焚其木城。國藩聞陸軍捷。會水師議所往。或言攻靖港。彭玉麐主援湘潭。乃飭褚汝航等進師。四月乙巳朔。賊船方順流下。褚汝航等令水勇據上風。放火焚獲甚眾。時陸路賊憤連日敗北。糾悍黨分三路來擊。塔齊布指揮眾軍奮力衝突。賊披靡。乘勝拋火焚賊館。賊遁入城。塔齊布以連日血戰。令暫息。夜四鼓。賊縱火船數隻。以小船載油燈無數。隨其後。冀

驚擾我軍。我以小艇撐拒。不得近。竟無損。庚午。褚汝航以水師擊賊。手大鼓督戰。彭玉麐楊載福乘三板往來。礮雷鳴。湘波爲之鼎沸。燬賊舟三百餘。延燒街市。百里外皆見火光。餘黨駛至審灣。欲乘風上竄。辛未。楊載福彭玉麐追至下攝司。北風勁。令軍士射火。自卯至未。燒船七百餘。紅巾黃巾隨波上下。殘賊逃入城。癸酉。賊自西門乘梯下江。忠淑伏兵奪之以登。遂克湘潭。是役也。八日內獲勝者十。斬馘萬人。凶渠僞目多斃於水火。解散以萬計。羣賊互疑。貳。自相屠戮者復數百人。爲湘軍初興第一奇捷。當擊賊

湘潭也。長沙鄉團詣國藩乞師攻靖港。國藩親率戰艇四十。陸勇八百。水急風駛。須臾迫賊壘。戰不利。水師驟返。爲賊乘。陸軍與團丁亦潰。奪浮橋走。國藩不能止。發憤投水。左右負之出。乃回省城整兵。布政使徐有壬按察使陶恩培會揭國藩敗狀。請巡撫劾罷其軍。駱秉章持不可。而湘潭捷書疊至。賊退走岳州。國藩旣列勝狀。復自請罪。文宗寬其罰。姑褫職自效。而

嚴旨責提督鮑起豹。株守不戰。奪其官。超用塔齊布署提督。徐有壬等反詣國藩賀。且謝罪。故事降黜人員不得上疏。

諭旨由大帥傳知。國藩旣黜名。請單銜奏事。

詔曰。可。然有

廷寄。仍由巡撫提督傳諭。塔齊布事。國藩謹。自居部曲。不主奏報。國藩自專兵柄。雅不爲文武官所悅。然每有陳乞。文宗輒優畲。故雖銜之而卒無以難也。湘潭旣復。賊畏湘軍。棄岳州遁。五月。石祥貞復自湖北糾大股陷華容。踞岳州。分黨擾西湖。辛亥。陷龍陽。甲寅。陷常德。而片股由宜昌枝江松滋入虎渡口。與西湖賊合。犯澧州安鄉。國藩遣胡

林翼周鳳山李輔朝援常德。值湖水漲，退保益陽。時寇氛遍湖南北，國藩方整軍艦船，謀再舉。汰舊勇爲五千人，增募數千，檄羅澤南李續賓自衡州回長沙，調知府李孟羣於廣西，統水勇千人。總兵陳輝龍於廣東，統水師四百人，礮百尊，疏請署提督塔齊布從征。六月己巳，賊陷武昌，湖北巡撫青磨久困圍城，食罄援絕，欲自縊，眾擁之出，南走長沙，畱數日，率飢卒至荊州。

詔斬以徇，罷台湧總督，以楊需代之。曾國藩分三路進兵，塔齊布褚汝航爲中路，趨岳州，胡林翼爲西路，趨常德，江忠淑林源恩爲東路，趨崇通。賊聞官軍大出，棄常德澧州走岳州。己丑，塔齊布敗賊新牆。甲午，褚汝航等渡洞庭，丙申，楊載福彭玉麐夏鑾破賊君山雷公湖，焚賊船百餘，賊多溺死。七月戊戌朔，官軍抵岳州，賊先期宵遁。庚子，褚汝航等敗賊城陵磯。癸卯，褚汝航彭玉麐敗賊道林磯。辛亥，塔齊布會水師復敗賊城陵磯。湖南肅清。壬午，曾國藩至岳州，遂督師援湖北。湘中良將健卒，強半東征。湖南岌岌憂戰守，駱秉章委軍事於左宗棠。宗棠剛明有智略，幼讀書，究心輿地，夙以諸葛亮自負。秉章資其贊畫，內綏土寇。

外協鄰軍東征兵源餉源倚之爲根本湖南屹然爲強國矣閏七月廣西土匪侵邊以王鑫周雲耀防江華王葆生李輔朝防郴桂恭城匪犯全州遣陳立紀江忠濟分防零陵東安八月廣東連州匪犯臨武參將趙永年拒走之仁化匪犯桂陽乳源匪犯宜章廣西灌陽匪犯道州江華甯遠嘉禾王鑫周雲耀及游擊駱元泰先後合擊走之曾國藩克武昌漢陽十一月駱秉章劾罷署提督多順自是巡撫專軍事指揮提鎮若部弁然

五年正月仁化匪犯桂陽趙啟玉擊走之匪遁入富川王

鑫周雲耀追討失利二月賊復陷武昌三月富川匪犯永明王鑫等自江華馳擊破之時黔匪大起湖南邊境戒嚴諸軍方專備廣東難兼顧於是以廣西防委永州知府黃文琛鄂防委岳州知府魁聯黔防委永順知府翟誥魁聯本以知兵補岳州

詔擢湖南按察使駱秉章未令之任魁聯自以奉特簡徑入省城秉章劾其委軍仍降知府以文格署按察使翟誥權辰沅道魁聯旣罷其軍隸江忠濟駱秉章專聽左宗棠吏事軍事諮而後行宗棠毅然任勞怨謗議頗起

然未嘗稍自卸。秉章自度才智不逮，信之彌專。時論以宗
崇善謀，秉章善任，兩賢之。四月，總督楊霽免，以官文代之。
趙啟玉攻廣東匪於樂昌，敗死。匪陷宜章，王葆生軍潰。富
川匪犯零陵，陷東安。五月，廣東匪自宜章犯臨武、嘉禾、龔
陷郴州，踞之。王葆生退保永興，衡陽土匪起，文格遣軍捕
之。六月，廣東匪踞郴者，分陷桂陽州。以劉長佑助王鑫攻
東安。八月辛卯朔，匪棄東安走新甯、全州。長佑援新甯，鑫
追餘匪，匪走祁陽，於道破散。癸巳，郴匪分掠興甯、安仁邊。
癸卯，陷永興。甲辰，陷茶陵，復分黨旁掠。官軍悉屯茶陵省

城戒嚴。九月，匪自茶陵走江西。永新分掠鄰，王葆生等收
茶陵。王鑫、陳士杰收桂陽州，移軍攻郴。十月，灌陽匪犯永
明。十一月癸亥，陷之。守將周雲耀自剄死。甲子，桂陽餘匪
犯甯遠。趙永年禦之下，灌墟戰歿。永年、雲耀皆起行伍，領
營兵。至是，營弁中無知名者，益專用練勇矣。乙酉，廣東匪
自郴西走永明。王鑫、劉長佑分軍追破之。鑫收永明，匪陷
江華。長佑還師衡州。十二月，貴州苗匪陷晃州，圍沅州，遂
陷麻陽。官軍擊走之。

六年正月戊辰，廣東匪棄江華遁。王鑫要擊破之。時江西

郡縣多陷於賊曾國藩駐南昌

詔湖南出師援應以劉長佑蕭啟江率師赴之賊復由湖北入掠平江湘陰前隊及長沙北界掠醴陵攸茶陵走江西遣王鑫屯岳州十月丁酉王鑫軍出境收通城十一月癸卯胡林翼克武昌十二月遣防邊諸軍收江西州縣趙煥聯自茶陵收永甯余星元自鄱收永新蓮花廳劉拔元自桂東收崇義上猶

七年廣西土匪起興安靈川二月遣蔣益澧率三千七百人援廣西曾國藩以父喪回籍遣王鑫赴江西助劉長佑攻臨江是年援軍四出境內無警

八年五月

朝旨以江西撫建均復惟餘吉安一府有曾國荃等軍數剿辦而浙事糜爛提督周天受資淺慮難統眾起復曾國藩援浙湘軍在江西者皆隸之八月曾國荃克吉安江西肅清胡林翼以母喪還益陽十月起復林翼署湖北巡撫國藩改援安徽

九年正月偽翼王石達開由江西竄湖南達開自六年韋楊構衅旁竄安徽江西福建有眾數十萬不隸於洪秀全

圖竊據自雄聞四川雄富欲道楚入蜀乃由南安崇義入桂陽縣總兵劉培元彭定泰防軍敗績二月陷宜章興甯郴州桂陽州人馬行六晝夜不絕湖南大震賊自桂陽窺衡州閒道出花園堡陳士杰軍數百扼七孔橋猝相遇憑橋發礮賊愕而止魏喻義方移營見賊至自山後吹角而出賊不測多少返奔趨新田甯遠圍永州別陷嘉禾臨武時湖南兵餉皆竭於遠征腹地空虛駱秉章以戰守事委左宗棠宗棠昕夕草檄告州郡徵召劉長佑江忠義田興恕等赴急而令劉培元等集潰卒蕭啟江還湖南劉坤一

趙煥聯周寬世等領舊部總督官文鄂撫胡林翼復遣蕭翰慶等率水師回長沙陳金鼇舒保爲後援一月內成軍四萬人湘防賴以固劉長佑軍至永州賊解圍走祁陽道州連陷東安新甯四月乙巳賊犯寶慶分圍武岡江忠義先期至武岡守禦圍五日解去石達開自攻祁陽遣周寬世朱品隆陳湜往祁陽助守陳士杰趙煥聯魏喻義防衡陽驛道遇賊熊羆嶺卻之賊聚圍寶慶增遣劉嶽昭等助軍英德匪北趨遣蕭啟江陳士杰等防郴五月陽山匪犯臨武藍山甯遠陷永明江華賀縣胡林翼遣李續宜將五

千人渡湖援寶慶。賊大合圍，連營百里，號三十萬。當是時，田興恕壁城東，趙煥聯壁城西，余星元屯洪橋，在興恕東。劉長佑從麻溪渡澧，亦屯城西。李續宜渡浪溪而營，水陸軍四萬，皆隸續宜。然湖南名宿將多在，非續宜所能統。賊聞新軍至，欲急破之，以潰諸軍。六月丁卯，續宜在長佑軍中，賊方來攻，續宜悉軍助守，賊卻走。續宜麾軍乘之，破賊壘七。其夜賊吹角滿山野，集眾西渡，明晨佯以前隊攻我軍，其後隊引而南走。田興恕開壁出戰，眾軍呼噪追逐，賊悉眾引去。石達開遂竄廣西。蕭啟江躡之出境，李續宜還。

湖北田興恕趨靖州防黔邊。八月廣東連州匪入宜章，胡國安拒走之。黃澗熙敗賊江華，石達開圍桂林，遣劉長佑募新軍，與蕭啟江赴援。長佑遂留廣西，授按察使。九月，陳士杰、黃澗熙擊匪藍山，平之。十二月，石達開分黨四出，以黃澗熙、劉嶽昭防永桂，張運蘭防道州。

十年閏三月，江南大營潰。四月，蘇州陷。曾國藩權兩江總督，左宗棠以四品京堂幫辦軍務，自是湖南軍事一以四品卿郭崑燾任之。崑燾固與宗棠囊贊軍務，歷年久，知人善任，略與宗棠等，歷官不達，其名未大顯。云五月，劉嶽昭

等出境克賀縣駱秉章奉

命督師入蜀。文格署巡撫。八月石達開遣黨犯永明。九月陷綏甯城。步攻武岡。以江忠義爲大將拒之。城守三日。賊走新甯。十月賊陷東安。掠道州。永明江華而東。自藍山趨桂陽縣。宜章守將胡國安戰死。賊竄南安。

十一年二月石逆後隊自藍山走桂陽縣。三月貴州匪入靖州。五月

詔文格還布政使任。以毛鴻賓爲巡撫。九月石逆黨復犯綏甯。其前在貴州者自來鳳入龍山。知縣先走。典史朱克敬率民兵守之。易佩紳道永順。馳擊之。賊解圍去。佩紳再戰失利。以趙煥聯領省城防軍。十月石逆黨陷會同。十一月石酋至永明。與來鳳賊合。走四川。

同治元年正月貴州苗教匪起。援軍出銅仁。

詔授田興恕欽差大臣。專治貴州軍。時湖南無寇。惟月報廣西貴州邊防。二年三月以席寶田江忠義軍出江西。援安徽。五月毛鴻賓遷督兩廣。惲世臨爲巡撫。八月石逆部黨李復猷犯永綏。時達開已於四川伏誅。餘眾欲還廣東。出西陽窺辰沅。湖南名將皆遠出。郭崑燾繼左宗棠經營

征繕指揮諸將裨前後各帥皆倚之李復猷入會同綏甯犯道州陳士杰拒戰賊走江華竄廣西別部掠通道敗靖州防軍十月廣東軍誅李復猷於連州三年五月江浙逸賊犯江西大增防軍分屯諸郡六月曾國荃克金陵洪逆平四年三月憚世臨罷李瀚章爲巡撫三月洪逆餘黨汪海洋等屯踞閩廣邊議四省合擊復增軍遣陳士杰自桂陽出仁化王永章自宜章出樂昌張義貴屯郴州四月鮑超軍譁於金口大掠而南入攸殘安仁陳士杰邀擊於桂陽大破之餘千人逸去十二月汪海洋及叛軍皆平五年

以李元度爲大將出沅州周洪印領二十營出靖州援貴州六年夏李瀚章遷總督劉琨爲巡撫罷周洪印軍以席寶田募新軍討苗十一年春席寶田盡平貴州苗軍竣四境無事而水陸軍如故省城夜懸火擊柝若備寇至如是者數年

王定安曰湖南居楚偏隅襟山帶水其民飯稻羹魚自給無秦晉商賈巨萬之家賦稅儉薄纔敵江浙一大郡自粵寇起兵餉大源由之出初援捐輸例量貲入官助軍已乃算緡錢權百貨而稅之謂之釐金釐金始揚州浸淫及湖

湘軍記卷二
南北歲入數倍課稅縮以局員藩司署紙尾不能問其出入東南各省仿行之饋餉不責之大農遂以內綏外伐嗚呼富強之術豈不由人哉

湘軍記卷二

武昌范德培校字

湘軍記卷三

東湖王定安撰

規復湖北篇

湖北居天下之衝西連秦蜀東控吳會南入湘粵北達中原四戰之國也自昔南北紛爭則扼襄漢楚蜀相攻則守荆彝江左偏安則重武昌武昌據上游謀金陵者率取建瓴之勢風利浹旬可二千里故楚旗東指則三吳震駭由形便勢順也洪楊初起其眾烏合才數千斬木揭竿望屋而食咸豐二年三月大舉犯桂林不克八月圍攻長沙幾

陷者數矣。卒困堅守弗得逞。舍之去。十月掠舟渡洞庭。浮大江順流而東。賊船號萬艘。長驅莫遏。凶燄自此盛矣。時總督程喬采駐湘潭。聞湖南解嚴。始入長沙議軍事。提督博勒恭武棄岳州先遁。獨向榮率師躡之。十二月乙卯。賊薄漢陽。漢陽與武昌隔一江。巡撫常大滄疏請江南提督雙福入武昌助防。已聞賊舟蔽江下。令軍士火城外廬舍。乘城而守。承平久。官民惶懼罔所措。而漢口爲商賈輻湊地。繁富甲天下。戊午賊陷漢陽。知府董振鐸巷戰死。遂燒漢口。延綿十五里。火聲隆隆。五晝夜不絕。鄂中財富盡矣。

武漢江面廣闊。值北風起則斷渡。冬令水涸。江中漲巨洲。賊自漢陽以鐵索繫船爲浮橋。絡繹達武昌。往來渡兵。風濤竟不作。益自詡爲神助。傍省城四圍築壘。日夜環攻之。當是時。向榮援軍萬人駐洪山。號勁旅。隔賊壘不能進。遣諜入城約巡撫夾擊。大滄度人心未固。啟城則眾志搖。未許。十二月丁丑。向榮自洪出進攻。破賊壘數十。賊驚亂。榮蹙之沙河。尸骸枕藉。河水爲不流。勝兵距城才三里。使人呼城軍。城守兵單薄不任戰。大滄主持重。仍不許。會天寒雨甚。火藥濕。榮始收軍。賊瞰文昌門濱江穴。地丈餘。守陴

者以管理地潛聽隱隱有聲請內穴注水灌賊大溜又不從己卯地雷發省城陷賊旗猶未登城內外援守軍望而走皆匿旁邑無一人抵禦者異於長沙城守時矣大溜湖南人以遲回致敗城亡身死眾皆歸咎至今談者有遺憾焉是時布政使梁星垣按察使瑞元道員王壽同王東槐林恩熙武昌府知府明善同知周祖銜等皆殉難江夏縣知縣繡麟持矛巷戰死尤烈紳民婦女懸梁投水者數十萬人死喪之慘二百年所未有事聞

文宗震怒徐廣縉逮問以張亮基署湖廣總督駱秉章署

湖北巡撫向榮爲欽差大臣又授前大學士琦善欽差大臣偕直隸提督陳金綬內閣學士勝保自河南進勦遏賊北竄時兩江總督陸建瀛督兵防江皖前軍駐黃州老鼠峽洪秀全既陷武昌有眾五十萬掠民船數萬與楊秀清等議所嚮或言據武昌爲僞都遣兵道襄樊北犯中原或言金陵天府饒財富宜踞爲根本徐圖進取楊秀清主之遂決意東

三年正月丁未洪秀全棄武昌悉眾東下輜重婦稚置舟中帆檣蔽江陸軍夾兩岸行所過武昌黃州蘄水蘄州皆

殘掠江南軍禦之老鼠峽敗績陸建瀛退走金陵向榮收復湖北省城招集官民籌善後榮率師追賊署總督張亮甚至自湖南江忠源率楚勇從之壬戌賊陷安慶省城二月乙酉陷金陵建偽都向榮追師駐孝陵衛

詔授江忠源湖北按察使飭赴向榮大營時曾國藩治團練長沙始創湘軍崇陽通城土匪大起眾數千人毘連湖南國藩遣江忠源劉長佑率楚勇往討三月江忠源回軍會勦平之自粵賊入鄂姦民乘機煽變濱江則沔陽監利石首通城蒲圻崇陽等邑濱漢則襄陽安陸德安等郡盜

賊時時竊發張亮基徽州縣行團練法遴紳耆董其事募賞練丁相保衛盜風稍戢四月駱秉章移撫湖南崇綸爲湖北巡撫江忠源自鄂東下師次九江聞賊趨江西移軍援南昌八月南昌解嚴賊出湖口上犯湖北張亮基調撫山東吳文鎔爲湖廣總督未至亮基遣同知勞光泰率礮船扼守田家鎮道員徐豐玉張汝瀛任防堵橫江編巨筏遏賊舟九月賊踞半壁山乙卯江忠源自江西馳至望賊營歎曰此天險也軍情地利兩失之謀以次日營羊角山而賊船乘風上駛急赴水營拒敵賊自半壁山以礮下擊

防軍跳勞光泰所部潮勇潰走忠源率鶴麗鎮兵搏戰失利北屯廣濟徐豐玉張汝瀛等陣歿賊水陸大進陷黃州按察使唐樹義由廣濟屯黃陂知府金雲門死之遂陷漢陽知府俞舜卿抱印投水死省城戒嚴吳文鎔行次長沙聞敗狀馳入武昌守之文鎔曾國藩座師也專倚湖南援疏調湘軍

詔曾國藩赴湖北援勦賂秉章任餉事責吳文鎔等堅守荊州將軍台湧撥兵往助國藩方議造水師未遑遠略與秉章謀檄知府張承實同知王鑫率湘勇三千赴鄂賊既踞漢陽分股北陷孝感麻城擾及德安學政青麀檄知縣張開壽募練丁二千防守張亮基前調鄖陽兵五百至應城唐樹義楊昌泗紮楊店賊阻防兵退漢陽同知伍惺連擊敗之十月丙子賊悉眾竄黃州武昌解嚴王鑫湘軍亦未果行江忠源回軍漢陽

詔授爲安徽巡撫十一月侍郎宋晉疏請飭曾國藩會江忠源援皖

詔促其行國藩因建三省會防之議且言黃州有賊援兵不能遽達皖境論目前緊報則廬州爲燃眉之急論天下

大局則武昌爲必爭之地。能保武昌，則扼金陵上游，固荆襄門戶，通兩廣四川餉道。目今之計，宜合兩湖兵力，水陸並進，以勦爲堵，不使賊舟回竄武昌，爲決不可易之策。因移書吳文鎔，謂南北兩省，以堅守省會爲主，俟水師成，乃言勦。十二月，廬州陷，江忠源死之。巡撫崇綸劾督臣閉門株守。

嚴旨責文鎔。文鎔初議堅守省城以待援，移書國藩，戒以無輕赴敵，必俟成軍乃行。時賊方擾江北諸城，未渡江，文鎔駐宿漢陽門，籌戰守，與士卒均甘苦，從容布署，人心恃以爲固。至是赴黃州督師，屯堵城，仍以書報國藩曰：君所練水陸各軍，必稍有把握，而後可應敵，不可以吾故率爾東下。東南大局，恃君一人，恐此後無有繼者。吾所處與君固不同也。

四年正月庚戌，吳文鎔攻賊黃州，乘逆黨張燈高會，出不意，馳突之，斬馘數百。連日大雪，軍士多凍死。賊分黨繞大營後，設伏山岡。乙卯，城賊大出撲我師，伏起火發，十三營皆陷，弁兵棄大帥走。文鎔死亂軍中，賊進陷漢陽。唐樹義水師亦敗於賊，落水死。

湘軍記 卷三
詔台湧署總督仍促曾國藩赴援時楊秀清遣石祥貞率
大股越武昌而上二月庚午朔陷岳州漢黃之賊溯襄河
進陷德安隨州棗陽學政青麇自德安入省城與崇綸收
集潰兵籌防守崇綸以憂解職青麇代爲巡撫標兵才千
餘不敷雉堞增募湖南四川勇乘城涼州高州總兵駐城
外諸郡縣多殘破外援絕守軍益孤於是曾國藩始率湘
軍建旗東征定營制以五百人爲一營其非湘鄉人各領
鄉勇者爲小營凡陸營五千餘人爲十三營前後左右中
旗幟色用其方以塔齊布周鳳山儲玟躬林源恩鄒世琦

鄒壽璋楊名聲曾國葆領之而塔齊布爲諸軍先鋒水軍
五千人爲十營五爲正五爲副衡州募者六營以成名標
諸殿元楊載福彭玉麇鄒漢章龍獻琛領之湘潭募者四
營以褚汝航夏鑾胡嘉坦胡作霖領之而褚汝航爲水軍
總統戰艦二百四十坐船二百三十員弁丁夫萬七千人
軍容於斯爲盛時貴州道員胡林翼帶黔勇六百至金口
國藩檄調回湘疏薦林翼之才堪倚辦賊未幾拜貴東道
林翼之經營湖北主持東征大計由國藩啟之也三月林
翼等敗賊平江塔齊布敗賊白港丁未復通城襄河之賊

糾黨上犯丁卯陷安陸四月甲戌陷荊門州窺荊州將軍
官文遣副將王國才禦賊龍背橋擊走之戊子陷宜昌總
兵訥欽知府吳開陽先期遁初東湖知縣張軒鵬約其鄉
人李光榮募三峽劇盜五百人保川鹽運道川勇喜騷擾
劫掠市廛民大譁聚萬人縛其酋楊五誅之軒鵬不自安
乞解任以巴東知縣鄭奎齡代之甫三日而城陷四鄉土
匪起川盜數百人踞石牌峽劫行旅殺人投之江凶殘尤
甚於賊賊踞十日棄城去鄭奎齡誅土匪川盜數十人居
民稍復是時賊酋石祥貞兩陷岳州曾軍輒擊走之塔齊

布等大捷於湘潭賊悉眾竄湖北語在湖南防禦篇丙申
官文遣李光榮復監利五月庚子李光榮復石首賊自宜
昌南竄者由宜都枝江松滋道虎渡口入湖南與西湖賊
合戊申青麐遣楊昌泗書紳魁玉擊賊磯窩敗之賊舟自
漢口橫竄塘角鮎魚套侯鳳岐等擊走之時省城守兵益
飢疲居民遷徙殆盡魁玉楊昌泗屯城外僅能自守青麐
素寬大得眾餉匱數月兵不忍舍去乃以衣裘金玉充犒
賞食盡與士卒啖糠覈六月己巳奸細竊發省城陷布政
使岳興阿按察使曹懋堅糧道李卿毅等死之青麐見賊

沐軍言 卷三
旗入欲自縊。眾擁之出。魁玉楊昌泗率所部隨護走長沙。中途逃者大半。其存者纔數百。羸悴無人色。駱秉章資之米。青麪西保荊州。

詔誅之。褫台湧職。以楊需為總督。四川軍雙保復潛江。荊州軍林天植復沔陽。破賊仙桃鎮。七月戊戌朔。曾軍復岳州。壬子。國藩親至岳州督師。癸丑。陳輝龍沙鎮邦擊賊城陵磯。南風大作。舟膠為賊所乘。歿於陣。褚汝航夏鑾馳救。被創落水死。是時水師初立。陳輝龍褚汝航皆大將。所部水師營尤精。方出戰時。國藩以水師接仗忌順風。止之。輝

龍笑曰。治水師三十年。何懼也。至是戰沒。三營水師皆陷於賊。一軍奪氣。明日。楊載福至。急請出戰。且曰。戰者勇氣也。吾視諸軍氣餒甚。昨日之敗。不急湔除之。將不復能自立。復出陷陣。陵突賊船。大破之。奪回所失礮船三十餘。塔齊布亦破城陵磯賊壘。禽偽秋官丞相曾天養。梟之。天養廣東人。貌猙猛。驍悍善戰。賊中自楊秀清外。推天養為最能軍。伏誅後。羣賊為茹齋。六日己未。諸殿元劉士元戰歿。癸亥。羅澤南破賊九塘嶺。澤南初合軍。未嘗出陷陣。賊以為怯。至是賊犯營。開壁大戰。遂以勇略聞。名亞塔齊布。賊

分股竄鳳凰山塔齊布擊破之乙丑塔齊布羅澤南破賊
高橋丙寅李孟羣水師追賊至荆河腦是月荆州軍林天
植克沔陽復仙桃鎮副將劉富成克安陸府總兵雙保克
天門知縣李殿華克孝感麻城於是黃州漢陽屬邑以次
收復閏七月戊辰朔塔齊布偵高橋賊營燈火往來如織
度賊將他遁己巳羅澤南李續賓李原治麾軍摩壘壘中
但張旗幟守者寥寥縱火燔之塔齊布率諸軍攻城陵磯
賊二萬人來迎值大風雨湘軍大呼陷陣燬其壘十三次
日李孟羣率師自擂鼓台順荆河窮追二百里至嘉魚境

羣賊遁回武昌國藩進駐螺山官文遣魁玉楊昌泗來會
復嘉魚蒲圻李孟羣楊載福水師抵金口塔齊布破賊羊
樓峒八月己亥鄂軍復斬水廣濟羅田庚子塔齊布復崇
陽破賊咸甯賊自岳州屢勦人懷離志國藩擇津路分張
告諭投木牌江中解散脅從索路票回籍者四千餘人武
漢踞賊僅二萬楊霈諸軍扼北路官文所部楊昌泗魁玉
扼西岸曾軍中江而下丁未國藩至金口乘小舟至沌口
登小軍山以望武昌賊營歷歷在目定分路進兵之策一
由金口達花園一由紙坊達洪山初水陸各軍破賊城陵

磯國藩會集諸將令陸軍收復崇通各城以赴金口再會
水軍議進止至是復議各軍所向羅澤南袖圖進曰賊精
銳盡聚花園環城賊壘九座長濠巨障延袤數里扼水陸
爲守破花園賊壘武昌可不攻而下宜遣重兵擊花園賊
壘而以一軍駐洪山爲犄角防賊繞竄是時塔齊布軍八
千澤南軍三千澤南意以花園屬塔齊布塔齊布專任戰
事行軍進止取決周鳳山鳳山以爲難澤南奮袂起曰吾
軍少不足當大敵必無人任此澤南請當之國藩益以李
光榮川勇千人普承堯彭三元寶勇千人歸澤南部署赴

花園塔齊布趨洪山國藩自率李孟羣等水師兩班序進
前班乘中流駛過鸚鵡洲出賊後賊回船下救我軍張兩
翼抄繞而上後班從上夾擊盡斃於水國藩令奪五綵篷
者賞百緡須臾獲其六艘楊載福徇鹽關火其舟羅澤南
李光榮李續賓攻花園分湖邊江邊中路而進賊方憑木
城守澤南令於眾曰鼓而進手鎗持滿伏地蛇行及壘而
起眾皆諾賊自木壘礮擊如雨三伏三進逼賊巢續賓光
榮踰溝入火其營魁玉楊昌泗攻蝦蟆磯衝入土城縱火
燔原兩岸之火與江中火燄合天爲之赤楊昌泗追至鸚

湘軍言 卷三
鷓洲與水師夾擊日已暝李孟羣猶麾軍前進率楊載福等毀沿江木柵進攻鮎魚套礮中賊火藥船羣舟與賊尸飛墮空中戊午國藩仍令三路進攻李孟羣攻漢陽朝宗門土城楊載福等攻塘角何越珽攻漢口載福追賊至青山北風勁挂帆西歸隨李孟羣入漢口內河焚賊船尸蔽江孟羣回攻漢陽魁玉楊昌泗亦自上游轉戰而下悉燬大別山晴川閣木壘於是城外賊船賊壘皆盡夜四鼓賊酋石鳳魁黃再興開東北門走留悍賊數百搖旗放礮佯作堅守狀我軍向漢陽門望山門轟擊壯士從僻處攀堞

而登餘賊狂奔截殺百餘李孟羣入保安門逕奔其父李卿穀殉難之所痛哭收骨軍士爲之感泣是時漢陽之賊方與水師對擊楊昌泗自南門梯繩入魁玉伏西門月湖隄截殺逃者午未之間兩城同克塔齊布聞花園克捷讓周鳳山曰羅君書生以少兵當大敵我乃避居此豈不爲笑俄城賊逃出塔齊布邀擊洪山蹙之沙湖塘角灣溺斃無算賊踐尸逃行至中流亦沒拔出幼孩二百餘降者七百餘捷聞

文宗手詔答曰覽奏感慰實深獲此大勝殊非意料所及

湘軍言 卷三
朕惟兢兢業自持。叩天速救民劫也。旋以國藩署湖北巡撫。中外嘖嘖。稱湘軍爲勁旅。益以澄清大局。屬望國藩。朝廷諭國藩。規金陵。責楊需任防守。國藩以母喪未除。辭巡撫。

詔賞兵部侍郎銜。以陶恩培代之。調四川按察使胡林翼。爲湖北按察使。楊需自德安入省城。國藩遣魁玉。楊昌泗。勦襄河餘匪。楊載福水師入漢江。搜賊船。盡燬之。時黃州。武昌縣皆復。而南岸悍賊集興國。北岸悍賊集蘄州。廣濟。皆以舟楫爲巢穴。國藩疏陳進兵方略。以塔齊布攻興國。

大冶。提督桂明領鄂軍攻蘄州。廣濟。自率水師趨黃州。詔慮桂明難任。飭文武官歸國。藩節制。九月乙酉。楊載福。彭玉麐破賊蘄州。丁亥。塔齊布克大冶。羅澤南克興國。詔授澤南浙江甯紹台道。十月壬申朔。羅澤南拒賊半壁山。敗之。半壁山者。孤峰拔起。前瞰大江。異時鄂軍失利。江忠源稱爲天險者也。賊據山作五壘。引湖溝之。北自田鎮。至蘄四十里。沿岸築城。鐵索纜江。自半壁山屬之田鎮。以遏舟師。乙亥。僞燕王秦日綱率眾自田鎮渡江。澤南營逼半壁山。塔齊布營偏富池口。中隔水。方作浮橋通兩軍。賊

出千餘阻谿。我不得橋。時南北兩岸賊屬集山左右。約二萬眾。澤南兵才二千六百。士恆懼。李續賓手刃逃勇三人。眾稍定。澤南與續賓分踞高阜。誠諸軍堅忍弗動。別將列江岸以待。賊三進三退。澤南鼓之。斬其大將二。回奔半壁山。澤南麾撓捷者躍而登。賊迫峭壁。墜崖死者數千。北岸賊奪舟逃。舟相擠。輒覆沒。追軍至。賊多投江。操舟者股栗不知所爲。遂奪半壁山。澤南呼壯士絕崖斷鐵鎖六。竹纜四。丙子。賊復自田鎮渡江。奪浮橋。澤南擊卻之。賊既失山。因作大筏傍岸。以固鐵纜。江中橫大筏三。盡鉤小船。節節

相牢連。斷其一節。明日復合。彭玉磨建議分船爲四隊。以其一守營。而備鑪鞴椎斧炭翦於頭隊船。趨鐵纜下。玉磨率二隊繼進。燒二舟。劉國斌椎鎖下鉗。孫昌凱鼓鞴冶鎖。鎖盡斷。筏上賊潰走。溺水。楊載福率三隊衝下。至鄔穴。回船擲火燒而上。玉磨燒而下。賊舟盡。田鎮賊跳。蘄州亦復。水師直達九江。癸亥。塔齊布羅澤南克廣濟。十一月己巳。克黃梅。曾國藩進駐九江。楊霈駐廣濟。桂明駐黃州。自是湖北軍事專於總督。上游則荊州將軍主之。十二月。安徽九江諸賊。以曾軍攻九江急。謀擾官軍後路。分股竄湖北。

湘軍言 卷三
時楊霈所部新舊兵勇二萬餘常疏列戰功實浮滑不足任見賊輒敗衄賊竄黃梅趨廣濟眾約四五千撲霈營方歲除置酒高會未交鋒營中火起部弁李士林倉皇扶霈突圍走蘄水而另股由小池口竄鄔穴龍坪聲言犯武漢湖北復大擾

五年正月乙丑朔偽燕王秦日綱檢點陳玉成丞相羅大綱會於蘄州己巳楊霈走漢口賊躡之霈不敢回省以堵賊北犯爲名率六千人趨德安留河南勇千五百守蔡店楚勇三千駐楊店辛未賊陷漢口聞霈已北行遂踞漢陽

沿江設壘遣黨入襄河犯漢川天門沔陽癸酉賊自蘄州竄黃州另股由富池口南渡至興國擄數千人陷通山崇陽通城咸甯擾江西武甯境曾國藩遣李孟羣援武昌師船泊黃鵠磯彭玉磨所部泊鮎魚套巡撫陶恩培主守事疏陳防禦情形

詔恩培不得專保武昌置漢陽漢口於不顧又以曾國藩圍攻九江楚北賊熾後顧甚可慮飭國藩派陸軍赴援免腹背受敵胡林翼自以湖北臬司有守土責詣國藩請行國藩遣林翼率兵二千五百王國才兵三千石清吉兵千

湘軍誌 卷三
回援武漢。荆州軍林天植攻仙桃鎮，戰歿。副將劉富成克漢川。二月，胡林翼擢湖北布政使。庚戌，湖北省城陷。省城兵初僅二千，是時內外防軍萬餘。總督在德安，陶恩培任事。甫三月，胡林翼、李孟羣新自江西來援。恩培與武昌知府多山嬰城守，賊懼水師不敢渡。由興國通山道，青山至塘角。林翼、孟羣方攻賊城外，忽見省城火起，鮎魚套水師被焚，急馳救而守陴士見賊黃旗，爭縋城走。外兵亦逃，賊繩引而上，恩培赴水死。多山然城上大礮，再發不鳴，自剄死。王國才自九江馳至，已三鼓，不知城已失，見城閉，呼門

入。賊初不辨其官兵，及蛇山前，兵與賊始相愕，殺聲互起。國才業已入，率親兵巷戰，登城招水陸軍皆不見。明日退出，駐城外。胡林翼潛夜結筏渡江，駐澗口，集潰卒。三月，詔胡林翼署湖北巡撫。當是時，長江漢河寇氛充斥，巡撫號令不出三十里，退屯金口，倚水師自保，增募二千六百。人合之，國才軍號六千，而國才屯沌口，與水師兵餉皆仰湖南。用兵久，庫儲益罄，欠餉輒逾數月。楊霈屯德安，猶虞不自保，疏請巡撫駐漢川，截賊北竄。林翼上言：荆襄據東南形勝，江漢又荆襄咽喉，急攻武漢，一城獲而兩城必復。

乃能內固荆襄外遏上竄之路

詔允之四月楊需退屯隨州劉富成擊賊長林港失利賊由平林市犯隨州西安將軍札拉芬來援戰死楊需退走棗陽

詔奪需官以官文爲總督常恩署布政使曾國藩憤武昌屢失疏言鄂中兩府一鎮繁華甲天下督撫標兵淫侈偷惰不可用自咸豐二年粵匪至鄂迄今不滿三載大潰者五次小潰小敗不可勝數臣愚以爲宜變易前轍掃除更張凡標兵之求歸行伍者不收練勇之曾經潰敗者不用

大抵山僻之民多獷悍水鄉之民多浮滑善用兵者好用山鄉之卒不好城市近水之人欲募湖北額兵宜在襄鄖等處深山窮谷之中招選寒苦力作之民擇其英鷲者假以時日而訓練之然後可得一旅勁兵古之謀大事者克一二名城不以爲喜得一二良將數千精卒則以爲大喜失一二名城不以爲憂失一二良將損傷數十壯士則以爲大憂卽素稱精勁之師或師勞而疲或餉匱而散或不和而驕蹇則愈引以爲憂故湖北急務惟募額兵新勇目前之收復鄂垣在此異日之保守楚疆亦在此五月楊

湘軍誌 卷三 七
需退走襄陽。授西凌阿欽差大臣。攻德安。官文屯潛江。天門閒。胡林翼進屯紙坊。楊載福自湖南率水師來會。林翼以武昌城周二十里。門有九。圍攻力不足。建議先攻漢陽。重兵扼滙口蔡店。截其竄襄之路。濬江隄。水師腹背攻之。則漢陽孤而城可破。後竟如所策。六月庚戌。官文遣軍復雲夢。辛亥。復應城。以孔廣順劉富成攻德安。楊昌泗常恩分三路徇阜市京山沙洋爲聲援。荆襄之防始固。七月。胡林翼遣彭玉麐攻蔡店。庚午克之。燬襄河鐵索浮橋。連破賊於塘角大別山。平其壘。乙亥。官文遣李光榮等克漢川。

八月壬辰。胡林翼自將攻漢陽。阻賊不能進。屯麥山。戊戌。賊撲營。軍士要餉不肯戰。林翼強之出。諫而奔。林翼發憤。索馬將死敵。圍人反鞭之。馬驚逸弗止。遇鮑超船載之去。諸裨弁聞巡撫在潰。卒稍集。屯大軍山。汰疲羸。增選精銳。調王國才駐大軍山。移營新隄。改李孟羣爲陸軍大將。楊載福爲水師總統。駐嘉魚蒲圻閒。部弁以披襟當礮石爲樂。林翼禮下走卒。人人自奮厲。軍勢復振。羅澤南在江西。上書曾國藩言東南關鍵在武昌。株守江西如坐甕中。日與賊搏戰無益。今賊據武昌。關鍵已失。崇通羣盜如毛。江

西湖南邊邑均不得安枕。欲制九江之命，必由武漢而下。欲解武昌之圍，必由崇通而入。爲今之計，宜令南康水師、潯陽陸師合力攻湖口，橫踞大江，截寇船上下，請率所部徑出崇通，據上游以圖武昌。取建瓴之勢，武昌復，東南大局始有轉機。國藩偉其言，時塔齊布新喪，湘軍所恃惟澤南。幕客劉蓉力言羅軍赴鄂，江西兵力益單，恐不能自守。國藩曰：吾固知此軍去，勢益孤，然規武昌以維東南大局，宜如此，豈能爲吾一身計？蓉曰：如此，吾亦從赴鄂。冀稍自效。於是遣澤南率五千人以行，澤南析其軍爲三，自領中

軍，以劉蓉將左軍，李續賓將右軍，道義甯取通城。九月乙丑，澤南克通城。甲戌，克崇陽。林翼聞援軍深入，躬逐之。己卯，遣三千人嚮蒲圻，適援賊數萬自義甯來，我軍敗績，復擊敗湖南防軍於羊樓峒，守將江忠濟死之。澤南遣兵爭羊樓，而自屯崇陽。石達開率黨至濠頭，欲襲澤南軍。澤南遣彭三元、李杏春往攻之，爲所乘。三元等兵少戰歿。澤南馳援不及，橫出羊樓，與林翼合軍大破之。西凌阿與荊州將軍綿洵攻德安，久不克。

詔奪西凌阿官，以官文爲欽差大臣。孔廣順逮問，官文先

海軍言
卷三
聞多山敗自沔陽還鍾祥至是移屯德安。

詔責官文遷延德安賊僅數千官文遣副將顏朝斌誘降賊日陸長年等爲內應安陸人鄭蘭芳蔡業廣入城受約賊棄城遁德安復癸巳羅澤南破賊羊樓峒癸卯胡林翼自嘉魚至澤南營勞師合兵西攻蒲圻賊眾三萬據白羊水以通咸甯林翼用蒲圻舉人賀霽若計出閒道據城西北鐵山賊出不意盡失其險澤南令軍士積薪燒其柵賊驚奔破其壘五營將劉萱陣亡萱劉蓉弟也沈毅能兵以先登中礮死我軍乘夜憑山吹角城賊盡走蒲圻復甲辰

官文軍復漢川十一月庚午林翼澤南合軍攻咸甯辛未楊載福自六溪口東下遣都司鮑超循南岸游擊李成謀循北岸克金口遂移駐金口先是長江爲賊有揚帆擄掠莫能制自國藩創立水師所紮營處無敢飛越者武昌陷賊數年而新隄商賈雲集徵釐轉餉遂爲重鎮水師之力也林翼屢疏陳國藩創立水師爲保全東南第一功云甲戌林翼等會師金口王國才由沌口出新灘會鮑超等攻賊破之水師駐大軍山乙酉澤南將五營屯洪山林翼將四營屯省城南五里墩城外賊見林翼軍至出拒戰澤南

襲之破大壘一小壘二李孟羣軍薄攻漢陽官文前軍攻漢陽者與南岸軍相聲援都興阿將馬隊護水師水陸聲氣相通羣帥和輯戰士人人自奮湖北軍士異於往昔矣十二月庚寅朔官文至三眼橋督李孟羣攻漢陽西門擊龜山月湖援賊破之水師至五顯廟破其水卡二十西門外賊壘皆盡辛卯澤南作浮橋於鮎魚套燬賊礮台北至塘角燬漢陽門外船廠林翼攻望山門二壘平之賊自是不敢出

六年正月羅澤南敗賊於小龜山大東門沙湖隄屯二軍

窰灣截賊餉道時石達開韋昌輝並擾江西陷七郡議者交章請調羅軍

文宗以武漢功可期持不許澤南上書曾國藩言武昌垂克南北岸皆爲我有陸軍扼窰灣水師扼樊口賊糧斷不能持久大功倖成當與麾下會潯城然澤南念國藩艱危戰益急自正月至二月大勝數十小戰百數官軍每戰輒薄城下仰攻多傷死三月戊午朔大霧己未城賊出焚小龜山民廬澤南陳大東門伺其歸要擊之賊開三門出萬眾拒戰澤南分軍三面應之幾不支而所部皆鄉里子弟

素負氣誼。恥相棄。澤南左額中鎗子。血濡衣。猶踞坐指揮。竟全軍還。乙丑。創發卒於軍。澤南家素貧。居鄉里時。與諸生講性理。著西銘講義一卷。人極衍義一卷。小學韻語一卷。姚江學辨二卷。讀孟子劄記二卷。周易本義衍言。皇輿要覽。各若干卷。詩文集八卷。自賊犯長沙。澤南倡生徒行團練法。率其鄉人子弟。轉戰兩湖。江西大小二百餘戰。克名城二十一。時如王鏊。李續賓。李續宜。蔣益澧。楊昌濬。皆其高弟。瀕危。林翼來省視。執手哭。澤南曰。危急時。站得定。方算有用之學。死何足惜。事未了耳。遂卒。軍士哀泣。江西

湖南聞之。皆嗟惋失氣。

詔以巡撫例贈卹。林翼令李續賓統其眾。仍屯洪山。時江西乞師益急。義甯賊復犯崇通。九江賊合興國大冶土匪。進至葛店。謀襲巡撫大營。林翼分軍四千。以劉騰鴻劉連捷將之。曾國華總其事。赴援江西。國華。國藩弟也。四月乙卯丙辰。援軍連破賊於羊樓。九江賊犯麻城。官文遣多隆阿敗之。柳子港。賊棄新州遁。甲寅。楊載福水師大捷於漢陽。五月。載福由鄂東下。搜沿江賊船。耀兵九江城外。而還。十日內往返千里。眾驚爲神。

詔責官文林翼老師。林翼疏言：臣頓兵城下，五月有餘，傷亡水陸軍士三千餘人，將弁百餘人，李續賓中礮墮地者數矣。夫兵易募而將難求。四月以後，乃禁仰攻。臣自率五千人扼武昌南路，李續賓領六千三百人扼城東路。水師六營下駐沙口，水陸之賊援絕勢窮。臣歷觀前史，李左車之告韓信，尚以頓兵城外，情見勢絀爲戒。戰易攻難，自昔已然矣。臣之才力何足言兵，惟材有限而志無窮，萬一變生他路，臣亦不敢退怯。於是

文宗知林翼之志，非僅規畫湖北已也。唐訓方敗九江，援賊於葛店。六月，賊復犯葛店，蔣益澧迎擊破之，追奔至樊口。會水師火其船，渡江攻黃州，十日不克，還。七月，石達開憤樊口之敗，率悍黨萬餘由廣濟，斬黃趨漢口。官文遣都興阿率馬步嚮黃州，至堵城，賊大至，多隆阿以馬隊設伏，合許廣藻團勇擊走之。十月，襄陽土匪起，以唐訓方舒保往討。隨州土匪起，以李光榮往討。兵至輒遁。官軍圍武昌，久自青山嘴塘角掘長濠，由大江通南岸嘴，以拒援寇。城賊日憊。林翼增募陸軍五千，水師十營，增長圍困之。十一月丙子，林翼復武昌。官文復漢陽。初，林翼偵賊窮蹙，與李

續賓楊載福議水陸合攻是日辰刻大風揚沙波濤洶湧
水師分上下環擊外援絕城賊益飢疲思逃巳刻分七隊
突門出我軍分路躡之賊狂奔林翼入城安撫生擒偽檢
點古又新等楊昌泗王國才李孟羣相繼入漢陽丁丑李
續賓分三道追賊武昌縣水師馬隊追賊黃州江夏鄉民
亦爭起要賊戊寅復武昌縣己卯復黃州庚辰復興國水
師復蘄州民兵復蘄水十二月乙酉復廣濟湖北肅清李
續賓陳師九江城下都興阿楊載福鮑超屯北岸小池口
林翼疏陳湖北軍政吏治大端謂古之治兵者先求將而

後選兵今之言兵者先招兵而並不擇將譬之振衣者不
提其領結網者不挈其綱是芟之也將自斃矣武漢形勢
自古用兵之地荆襄爲南北關鍵武漢爲荆襄咽喉武漢
有警則鄰疆震驚南服均阻控制無術四年之中武昌三
陷漢陽四陷

國帑因而虛糜民生因而凋敝昔周室征淮師出江漢晉
代平吳久謀荆襄王濬造船循江而下陶侃之勛鎮守武
昌宋臣岳飛李綱之謀畫岳鄂均以此爲高屋建瓴之勢
控制長江惟鄂爲要固東南一大都會矣夫善鬪者必扼

其吭善兵者必審其勢。今於武漢設立重鎮，則水陸東征之師，軍火米糧，委輸不絕，傷痍疾病，休養得所，是知平吳之策，必先保鄂明矣。請於武漢設陸師八千人，水師二千人，日夜訓練，本境亂民隨時征討，固可銷除隱患。東征之師，久役者必疲，善戰者必傷。若以武漢防兵更番替代，則士氣常新，軍行必利。湖北牧令多不得人，吏治不修，兵禍之所由起也。士氣不振，民心之所由變也。未有不養士而能致民，亦未有不察吏而能安民者。卽如五年大熟，州縣乃或報災，經臣駁斥在案。六年大飢，州縣轉不報災，又經

臣駁斥在案。以豐爲歉，是病國計；以歉爲豐，是害民生。而終必害於國計。凡下與上交接之事，諉之幕友，而官不問；官與民交接之事，諉之門丁，而官不問。夫州縣之所謂小事，卽百姓之大事。今日之所謂小賊，卽異日之大賊。深思利弊之原，劾貪非難，求才爲難。前者劾去，後者踵事而巧，避其名，則其弊有不可勝言者矣。地方吏治，是臣專責。今欲嚴禁陋習，與羣吏更始，暫勿拘臣文法資格行之數年，或可改觀。

文宗嘉納焉。方官文之駐軍北岸也，將吏頗構同異。武漢

既克林翼渡江見總督甚懼約爲兄弟軍政吏治林翼主稿官文畫諾讒閒無由入論者謂林翼忠君濟難官文服善讓賢爲均不可及云

七年正月襄陽土匪陷房竹山保康興山由歇馬河趨宜昌時李光榮率川勇三千回蜀荆宜施道莊受祺白官文留勦匪紳民詣光榮議扼茶庵鎮境山東山寺防郡城受祺與總兵景輝促光榮進軍霧渡河與匪左戊申匪由小路撲城知府阮福與景輝率兵四百扼馬難坡至夜明瀝全軍殲焉己酉昧爽宜昌陷先是阮福告急荆州請宜昌

鹽稅數萬緡給軍事定紳民任償之受祺不許期五日往援又不至光榮所部川勇人給千錢故不用命辛亥光榮回營南門部卒夜謀變被害餘卒潰至董市匪留十日竄遠安荆門回至襄陽巴揚阿唐訓方勦平之二月皖賊由小池口犯黃梅知縣單瀚元白都興阿請空城誘賊俄騎賊由二郎河撲城入都興阿先遣多隆阿伏城南鮑超伏城西王國才駐桂家畝拒其後孔廣順營大河鋪爲旁翼自麾馬隊連環抄擊賊馬驚而跳矛刺其足騎賊多墜相踐踏無一生還者三月辛酉多隆阿鮑超克段窰丁酉多

隆阿王國才連克楓樹坳獨山鎮李孟羣率師援皖道羅田擊霍六英山賊敗之四月賊酋陳玉成自桐城分犯湖北號十萬黃梅廣濟蘄水蘄州羅田諸邊皆大擾以李續賓駐小池口鮑超防黃梅調福寶武三營援蘄州羅田多隆阿等燒賊壘二十一閏五月乙巳蘄州防軍挫胡林翼赴黃州督師親巡營壘授方略武漢粗安六月皖賊復大舉入鄂邊以石清吉屯黃梅停前驛孔廣順王國才巴揚阿屯廣濟大河鋪賊分聚蘄州張家塆蘄水劉公河以邢高魁舒保唐訓方等禦之大小五十餘戰賊勢猶未衰楊

載福遣師船入廣濟內湖多隆阿鮑超擊賊億生寺破其壘十九水師焚浮橋蔣凝學敗賊童司牌王國才移營失火被轟死七月庚辰朔多隆阿鮑超擊賊黃梅黃臘山破其壘四十八斬馘五千庚寅舒保攻賊黃岡東敗之丁酉再戰於上巴河何紹彩李續賓唐訓方等分三隊紹彩軍不利將退顧胡林翼立馬陣後軍士皆踴躍赴敵訓方等鼓譟乘之賊大敗平其壘四十四進軍蘄水追賊至廣濟西賊遁太湖宿松八月胡林翼至九江會都興阿楊載福攻小池口小池口與潯城隔江對峙爲江皖入楚咽喉賊

壘石爲城浚濠衛之林翼令唐訓方等由蘄水達黃梅多
隆阿鮑超破黃梅後山楊載福水師自陸家嘴進晝夜環
攻偵賊炊煙數日不起令軍士擔草囊沙癸亥大風雨蔣
凝學等分攻三門徑填其濠都興阿縱馬隊施火箭燔賊
棚克僞城九月己卯朔胡林翼還武昌

八年正月六安賊窺隨州棗陽以舒保拒之太湖賊竄蘄
州界以唐訓方拒走之多隆阿敗賊仙田鋪追至太湖城
二月英山賊犯羅田知縣崔蘭馨擊走之唐訓方敗賊黃
泥畝三月李孟羣敗賊金家寨賊由了角山一日夜行百

里丁亥陷麻城舒保屯兵商城聞警回援賊眾三四萬環
四門築壘爲負嵎計胡林翼遣李續宜鮑超何紹彩等往
勦四月李續宜舒保大破賊於麻城平其壘五十八戊午
賊自光山陷黃安舒保分軍禦之官文調李續賓回援黃
安時續賓新克九江威名甚著

詔授浙江布政使論者請以續賓赴浙任軍事胡林翼疏
爭之乃留楚皖之交當劇寇五月丙子續賓克黃安戊寅
麻城賊夜遁續賓追至商城壬戌蘄防將唐訓方等破皖
賊於界牌時閩浙寇亟起復曾國藩帥江西湘軍援浙國

潘丁父憂逾一年矣。聞命卽行。七月。至南昌。胡林翼以母憂解任。

詔官文並署巡撫。十月壬子。李續賓戰歿三河。湖北大震。起復林翼仍署巡撫。十二月。林翼至黃州督師。

九年。湖北境內無事。胡林翼壹意謀皖。以多隆阿當前敵。將馬步軍五千。立蔣凝學爲大將。合鮑超唐訓方軍萬五千。李續宜屯黃州。軍六千。依林翼大營。二月。李孟羣戰死廬州。三月。僞翼王石達開犯湖南。眾三十萬。五月。官文胡林翼大發水陸兵援之。六月。援湘大將李續宜破賊寶慶。

援軍還鄂。十二月。胡林翼駐太湖督師。

十年二月。以蕭翰慶等六千人援浙。未至。杭州陷。三月。江南大營潰。曾國荃率萬人圍安慶。語在規復安徽篇。

十一年正月壬戌。陳玉成糾捻黨犯羅田。成大吉敗之。松子岡。斬捻酋龔瞎子。乙丑。賊陷蘄水。丙寅。陷黃州。分掠麻城。黃安。孝感。黃陂。時湖北各軍集皖疆。省城空虛。僅存標兵二千。鄂中大震。官民逃避一空。宦橐商貲。多被遊兵攘掠。胡林翼尚在太湖。官文率唐訓方晝夜登陴。李續宜自青草塢回援。舒保馬隊繼之。彭玉麐水師馳至。省防始固。

賊上犯雲夢。陷德安。隨州三月丁酉。彭玉麐。金國琛。克孝。感賊棄雲夢。應城。遁黃陂。黃安亦復。麻城解圍。陳玉成回。竄宿松。四月。劉嶽昭援蜀軍。自宜昌回攻隨州。辛酉。擊賊。城外敗之。李續宜駐軍澗口。乙丑。己巳。舒保。金國琛攻圍。德安獲勝。僞忠王李秀成由江西犯鄂邊。以唐協和等守。興國。何紹彩等分守崇陽。通城。通山大冶。賊眾七八萬。犯。興國。唐協和等失利。退屯大冶。壬辰。賊隨至。前擾武昌縣。水師曾紹霖擊卻之。官文以賊氛近省城。移李續宜回軍。城外。巴揚阿。何紹彩分屯東湖。站紙坊。癸卯。彭玉麐。蔣凝。

學會復武昌縣。六月庚寅。李元度自平江復通城。癸巳。復。崇陽。胡林翼時病嘔血。強起還省城。遣成大吉等分擊賊。於是興國。大冶。咸甯。蒲圻皆復。賊走江西。七月丁酉。舒保。金國琛等克德安。庚戌。唐協和等克蘄水。八月丁巳。曾國。荃克安徽省城。

詔胡林翼加太子少保銜。時林翼篤病。薦李續宜自代。庚。辰。蔣凝學等攻黃州。遣將劉維楨誘賊出。殲之。黃州復。壬。午。胡林翼薨。

詔贈總督。湖南湖北建祠。以李續宜爲湖北巡撫。曾國藩。

疏言胡林翼起家翰林由貴州道員不半載擢署巡撫是時州縣大半淪沒坐困金口洪山一帶無兵無餉一錢一粟皆親作書函求貸至發其私家之穀以濟軍迨攻克武漢論者以爲可稍息肩矣林翼悉師越境圍攻九江分救瑞州督撫之以全力援勦鄰省自湖北始也九江圍勦年餘中間石達開自江西窺鄂陳玉成自皖北犯鄂者三次終不肯撤九江之圍回救本省之急或親統一軍肅清蘄黃或分遣諸將驅歸皖豫潯功甫蒞復以全鄂之力辦皖北之賊迨李續賓覆軍三河林翼母喪歸籍急起痛哭視

師進駐黃州論者又以良將新逝但可姑保吾圉不宜並顧鄰境林翼驚魂甫定卽派重兵越三千里解寶慶之圍援湘之師未返又議大舉圖皖十年春閒大戰於潛山太湖相繼克之親駐太湖督勦本年五月回援鄂省病中屢寄臣書勿撤皖圍故安慶之克臣推林翼爲首功近世將材湖北最多如塔齊布羅澤南李續賓都興阿多隆阿李續宜楊載福彭玉麐鮑超林翼均以國士相待人人有布衣昆弟之懽書問餽遺不絕於道每遇捷報推官文與臣主稿偶一出奏則盛稱諸將之功其心兢兢以推讓僚友

扶植忠良爲務。外省盛稱楚軍協和。而於林翼之苦心調護。或不盡知。湖北三次失守。乙卯丙辰之際。窮窘極矣。權鹽抽釐。稍足自存。林翼綜覈之材。冠絕一時。七年春閒。創議減漕。每年民間省錢一百四十餘萬串。帑項增銀四十萬兩。節省提成銀三十一萬兩。州縣征收正課。不能浮取毫釐。亦不準借催科政拙之名。爲滑吏肥私之地。故湖北瘠區。養兵六萬。月費至四十餘萬之多。而商民不疲。吏治日懋。斯又精心默運。非操切之術所得與也。咸豐四年。臣曾奏林翼之才勝臣十倍。近年來尤服其進德之猛。不敢阿好溢美。亦不敢沒其忠勤。疏入。

詔宣付史館。九月。劉嶽昭攻隨州。遣劉維楨持僞文誘賊出。十月丙辰克之。湖北平。其後兵事附平捻篇。

王定安曰。曾文正胡文忠皆命世之英。胡公氣局恢張。有囊括四海之志。若天假之年。俾歲厥功。其勛名豈出唐郭子儀宋韓琦下哉。然其初以黔軍六百。徘徊金口。進退無所屬。曾公奇其才。上疏力薦。至謂出已上。挈之江西。猶碌碌無所表見。及援武昌。擢疆帥。感激發舒。事業烜赫矣。胡公所任大將。惟多隆阿鮑超是所拔擢。其他羅澤南李續

湘軍記
卷三
賓李續宜楊載福彭玉磨均曾公舊部撫而有之遂成偉
烈盛矣哉曾公窮窮畏抑日思以人事君所論薦如胡公
者往往有之胡公亦號愛士後竟無聞焉由斯言之曾公
過人遠矣

湘軍記卷三

東湖黃學濂校字

